

毛詩注疏

附校勘記

毛詩注疏

光緒十九年
陝甘味經刊
書處重校刊

陝西提督學政

臣柯逢時附

奏摺片

再陝西藏書既少板本無多自南中販運來者多
由陸路其價甚昂寒士每苦難得往往購買俗惡
坊本經文則刪節不全字句則訛謬不堪積久相
沿遂成風氣南北山距省更遠並坊本亦復難尋
臣上年咨商撫臣籌捐銀兩於書院刊刻書籍捐
廉俸千兩以爲之倡各屬官紳亦有深明大義者
共捐湊銀壹萬餘兩皆出於至誠毫無抑勒已全
數發商歲取其息陸續刊書其捐至千兩以上者

當卽咨明撫

臣

循例

奏請建坊復經撫

臣

設法每歲籌捐一欸專撥刊書

之用已於本年在味經書院開辦先刊正經正史
卽以院長劉光黃總理其事委監院周斯億兼管
雜務擇諸生通曉六書留心古籍者加給膏火分
司校勘不更另籌薪水以期費不虛糜可成善本
俟書板刻成聽各屬書院儘數刷印藉資流布惟
事屬創始一切章程雖經妥議而持久爲難仰懇
敕下陝西巡撫學政隨時督察極力維持庶日久不致
弊生於學校實有裨益爲此附片具陳伏乞

聖鑒訓示謹

奏光緒十七年十月初三日奉

硃批著照所請該部知道欽此

欽定四庫全書總目毛詩正義四十卷

漢毛亨傳鄭元箋唐孔穎達疏案漢書藝文志毛詩二十九卷毛詩故訓傳三十卷然但稱毛公不著其名後漢書儒林傳始云趙人毛長傳詩是爲毛詩其長字不從艸隋書經籍志載毛詩二十卷漢河閒太守毛萇傳鄭氏箋於是詩傳始稱毛萇然鄭元詩譜曰魯人大毛公爲訓詁傳於其家河閒獻王得而獻之以小毛公爲博士陸璣毛詩草木蟲魚疏亦云孔子刪詩授卜商商爲之序以授魯人曾申申授魏人李克克授魯人孟仲子仲子

授根牟子根牟子授趙人荀卿荀卿授魯國毛亨
毛亨作訓詁傳以授趙國毛萇時人謂亨爲大毛
公萇爲小毛公據是二書則作傳者乃毛亨非毛
萇故孔氏正義亦云大毛公爲其傳由小毛公而
題毛也隋志所云殊爲舛誤而流俗沿襲莫之能
更朱彝尊經義考乃以毛詩二十九卷題毛亨撰
注曰佚毛詩訓故傳三十卷題毛萇撰注曰存意
主調停尤爲於古無據今參稽衆說定作傳者爲
毛亨以鄭氏後漢人陸氏三國吳人併傳授毛詩
淵源有自所言必不誣也鄭氏發明毛義自命曰

箋博物志曰毛公嘗爲北海郡守康成是此郡人故以爲敬推張華所言蓋以爲公府用記郡將用箋之意然康成生於漢末乃修敬於四百年前之太守殊無所取案說文曰箋表識書也鄭氏六藝論云注詩宗毛爲主毛義若隱略則更表明如有不同卽下己意使可識別

案此論今佚此據正義所引

然則康

成特因毛傳而表識其傍如今人之簽記積而成

帙故謂之箋無容別曲說也自鄭箋旣行齊魯韓

三家遂廢

案此陸德明經典釋文之說

然箋與傳義亦時有異

同魏王肅作毛詩注毛詩義駁毛詩奏事毛詩問

難諸書以申毛難鄭歐陽修引其釋衛風擊鼓五

章謂鄭不如王

見詩本義

王基又作毛詩駁以申鄭難

王王應麟引其駁芣苢一條謂王不及鄭

見困學紀聞亦

載經典釋文

晉孫毓作毛詩異同評復申王說陳統作

難孫氏毛詩評又明鄭義

並見經典釋文

祖分左右垂數

百年至唐貞觀十六年命孔穎達等因鄭箋爲正

義乃論歸一定無復歧塗毛傳二十九卷隋志附

以鄭箋作二十卷疑爲康成所併穎達等以疏文

繁重又析爲四十卷其書以劉焯毛詩義疏劉炫

毛詩述義爲橐本故能融貫羣言包羅古義終唐

之世人無異詞惟王讜唐語林記劉禹錫聽施士
句講毛詩所說維鷦在梁陟彼峭兮勿剪勿拜維
北有斗四義稱毛未注然未嘗有所詆排也至宋
鄭樵恃其才辨無故而發難端南渡諸儒始以掊
擊毛鄭爲能事元延祐科舉條制詩雖兼用古注
疏其時門戶已成講學者訖不遵用沿及明代胡
廣等竊劉瑾之書作詩經大全著爲令典於是專
宗朱傳漢學遂亡然朱子從鄭樵之說不過攻小
序耳至於詩中訓詁用毛鄭者居多後儒不考古
書不知小序自小序傳箋自傳箋闕然佐鬬遂併

毛鄭而棄之是非惟不知毛鄭爲何語殆併朱子之傳亦不辨爲何語矣我

國家經學昌明一洗前明之固陋乾隆四年

皇上特命校刊十三經注疏

頒布學宮鼓篋之儒皆駸駸乎研求古學今特錄其書與小序同冠詩類之首以昭六義淵源其來有自孔門師授端緒炳然終不能以他說掩也

毛詩正義序。

夫詩者論功頌德之歌止僻防邪之訓雖無爲而自發
乃有益於生靈六情靜於中百物盪於外情緣物動物
感情遷若政遇醇和則歡娛被於朝野時當慘黷亦怨
刺形於詠歌作之者所以暢懷舒憤聞之者足以塞違
從正發諸情性諧於律呂故曰感天地動鬼神莫近於
詩此乃詩之爲用其利大矣若夫哀樂之起冥於自然
喜怒之端非由人事故燕雀表喁喁之感鸞鳳有歌舞
之容然則詩理之先同夫開闢詩述所用隨運而移上
皇道質故諷諭之情寡中古政繁亦謳歌之理切唐虞

乃見其初犧軒莫測其始於後時經五代篇有三千成
康沒而頌聲寢陳靈興而變風息先君宣父釐正遺文
緝其精華褫其煩重上從周始下暨魯僖四百年閒六
詩備矣卜商闡其業雅頌與金石同和秦正燎其書簡
牘與煙塵共盡漢氏之初詩分爲四申公騰芳於鄢郢
毛氏光價於河閒貫長卿傳之於前鄭康成箋之於後
晉宋二蕭之世其道大行齊魏兩河之閒茲風不墜其
近代爲義疏者有全緩何胤舒瑗劉軌思劉醜劉焯劉
炫等然焯炫並聰穎特達文而又儒擢秀幹於一時騁
絕轡於千里固諸儒之所揖讓日下之無雙於其所作

疏內特爲殊絕今奉

勅刪定故據以爲本然焯炫等負恃才氣輕鄙先達同其所異異其所同或應畧而反詳或宜詳而更畧準其繩墨差忒未免勘其會同時有顛蹟今則削其所煩增其所簡唯意存於曲直非有心於愛憎謹與朝散大夫行太學博士臣王德韶徵事郎守四門博士臣齊威等對共討論辨詳得失至十六年又奉

勅與前脩疏人及給事郎守太學助教雲騎尉臣趙乾叶登仕郎守四門助教雲騎尉臣賈普曜等對

勅使趙弘智覆更詳正凡爲四十卷庶以對揚聖範垂

訓幼蒙故序其所見載之於卷首云爾